

*Cum rudibus doctus, dives cum paupere tendit,
Mors omnes homines judicat esse pares.
Non opus est ergo, cur præcedentia strictè
Servetur, siquidem nulla tenenda foret.
Insuper ad Mortem rari præcedere malunt,
Ultimus e contra quilibet esse cupit.
Hinc condonandum credo, veniamque requiro,
Quòd non procedant ordine quique suo.
Mors est directrix; si non bonus ordo tenetur,
Debebit Morti, non mihi, culpa dari.*

AD LECTOREM, ET AUDI- TOREM.

De Doctrina Mortis.

Disce mori, quicumque legis mea carmina Lector!
Quisquis es, Auditor! tu quoque disce mori.
Disce mori, quicumque cupis caelestia regna;
Si vis cum Christo vivere, disce mori.
Disce mori, si vis animam salvare perennem.
Hæc est in cunctis unica, disce mori.
Disce mori; si morte malâ moriêre, misellus
Semper eris: quare flagito, disce mori.
Disce mori; si morte bonâ morierê, beatus
Semper eris: quare consulo, disce mori.
Disce mori; fugiunt cita tempora, labitur ætas;
Dum breve tempus habes, incipe, disce mori.
Disce mori; nam, quando tuos Mors claudet ocellos,
Tunc serum nimis est, hinc modò disce mori.
Disce

Disce mori; nullum piguit, nullumque pigebit:

Sanctâ morte mori discere, disce mori.

Disce mori; multos piguit, multosque pigebit

Non voluisse mori discere, disce mori.

Disce mori; cunctas ars hæc supereminet artes;

Nil profunt omnes hæc finè, disce mori.

disce mori; Satis est, unum si sciveris illud;

Quamvis nescieris cætera, disce mori.

Disce mori; nihil est, unum nisi sciveris illud,

Quantumvis scieris cætera, disce mori.

Disce mori; nescis, quoadusque superstes haberis;

Mors sua libravit spicula, disce mori.

Disce mori; versus hæc est intentio nostri.

Nullâ mihi petitur gloria, disce mori.

Disce mori, mundo, devincere dæmona disce:

Disce voluptates spernere, disce mori.

Ad Momum Criticum.

Disce mori, nec carpe dicax pia carmina Mome!

Carpere dediscas, Critice, disce mori.

